



ILLUSTRISSIMO VIRO JOANNI
EQUITI, MARCHIONI DE GASSION
ET D'ALUYE,
COMITI DE MAGEZIR, ET MONDOYER,
BARONI D'AUDAUX, ARBUS, BUGNEIN, MERITEIN, &c.
ANTIQUO GUBERNATORI CÆQUOSÆ, ET SAN-SEVERI,
CASTRORUM PRÆFECTO.

QUÆSTIO MEDICA,

*Quodlibetariis disputationibus manè discutienda in Scholis Medicorum,
die Jovis 19 Mensis Decembris 1720.*

M. CLAUDIO DE LA VIGNE DE FRECHEVILLE,
Doctore Medico, Præside.

An fluxus menstrui & transpirationis materies eadem?



I.
QUOD Græci *Καταμηνία*, Latini verò *Menses*, *Menstrua*, *Flores* vocitant, sunt periodicum & naturale sanguinis ab utero & vaginâ profluvium. Tenellis ignotum est virginibus, pubertatis vulgare signum, munificus sanitatis index, mulieris ornamentum & decus, quo artibus & disciplinis alumnos, nepotes patribus, heroibus successores pollicetur. Non ergo, ut quidam scurræ asso-

Hipp. lib. 1^o.
morb. mulier.

Lib. 1^o. de
morb. mulier.

lent, foeminei corporis sentinam uterum dico; nec menstruam vacationem fatuis disteris prosequitor. Qui singulo mense funditur sanguis, si sana fuerit foemina, non foetet; non mali coloris est, prodit enim *velut à victimâ*; non qualitate ullâ ab arterioso sanguine degener, immò arteriosi pars est purissima. Audi quibus, iactentur foeminae doloribus si statis temporibus non erumpat, & à symptomatum gravitate vacationis hujus praestantiam & utilitatem intellige. Decoloratur vultus, deprimitur cibi appetentia, nauseat stomachus vel evomit, cor laborat palpitationibus, anhelant, febricitant paululum; nunc lacrymae, gaudium timoremque delirio commiscunt. Ab anno ætatis decimo-quarto ad quadragesimum-octavum ulque uterum mensibus singulis cruentari notum est experientiâ, nisi gesserit utero foemina vel lactaverit. Pro tamen temperamentorum varietate, regionum temperie, rerum non naturalium usu diverso variare hujus evacuationis terminos satis superque constat. Variat & quantitas. Hæc secundum Hippocratem duarum *Heminarum Atticarum* est. Hemina uncias circiter decem ponderare creditur. Undenam istius sanguinis proventus? quænam est hujus effluxus causa efficiens? plurimum inter Medicos controversitur. Proh vana Majorum nostrorum in rebus Physicis indagatio, in quâ primus erat ad veritatem gradus error, vel mendacium! Nunc occultis facultatibus, astrorumque influentiis nec ipsi credunt pueri; fermentis vix ulla restat hodiè apud eruditos fides. Quæ transpirationis, eadem est menstrui fluxus materies, cum uniuscujusque eadem sit causa, & sola utriusque diversitas ab accidentibus sit repetenda.

II.

HUMORIS ignoti priùs, desumere proventum ab uberiori secretionem rationi magis est consonum, quàm eundem ab aliis minus abundantibus secretionibus repetere. Non à bile, non à succo pancreatico, salivâ, lymphâ scaturiunt menses. His in secretionibus secreti succi maxima est utilitas. A perspirationis igitur insensibilis materie habeant originem necessum est. Transpirationi illud est peculiare, ut in alios faciliè humores commutetur: alii è contra corporis succi difficulter fiunt perspirabiles. Hæmorrhagiae, alvi fluxus, frequentia sputa, continui sudores, aliaque vacationes quamplurimæ quæ in morbis quotidie apparent, nihil aliud sunt, quàm ipsamet perspirationis insensibilis materia, per sensibiles corporis vias non sine incommodo effluens. Transpiratio est perenne humoris tenuissimi & insensibilis per exilia cutis vascula effluvium. Nulla in toto corpore utilior vacuatio, nulla major; nullus magis tritus magisque comminutus succus. Quò est insensibilior, eò laudabilior. Innumeris perforari cutem foraminulis, quibus residuum alimenti nubeculatim avolat, satis à Leuwenhoekio demonstratur; sed & in intintis visceribus fieri transpirationem plurimi non credunt. Fit tamen, & unius diei spatio per respirationem per os factam ad semilibræ circiter educi, experimento patet Sanctorianò. In pueris satis abundè, in adultis pleno flumine, in senibus difficulter effluit. Si plus æquo foras pellitur, emacrescit animal; si deficit, augetur statim corporis pondus, & à pristino sensim recedit æquilibrio. Pendet à nutritione hic transpirationis fluxus, ita ut perfectâ nutritione, exquisita fiat transpiratio. Nec minùs cum nutritione congruit sanguinis menstrui profluvium; si enim bene nutriuntur partes, tempore solito laudabilis fiet *Catameniorum* evacuatio. Immo postulant menses quasi factum in organis incrementum, quò partibus concilietur robor, coarctentur fibrarum poruli, minor impendatur succi nutritii quantitas insensibilis transpirationis fluxum non eadem proportione adaugens, quâ adaugetur copia, aliam proinde viam naturæ viribus accommodatam quæritans.

III.

CUM crisi bus quas prudens natura in morbis ad salutem molitur, non immeritò comparari possunt menstruæ vacationes. Utræque certum temporis intervallum postulant; utræqueurgentem materiam eliminant. Quis unquam Physicus raræ hujus constantisque periodi causam dabit? Sic plura complectitur ars Medica, quibus religiosum est credere, quia experimentis respondent; quæ verò curiosius rimari temerarium est, & inutile. Differunt tamen crises & menstrua, quod hæc ad incolumitatem conservandam, illa necessariò fiant ad restituendam sanitatem. Neque tu credideris solam foeminam periodicam purgationem pati: viris etiam compluribus familiaris est. Vel hæmorrhoidalia vasa aperiuntur, vel ex naribus profluit sanguis, vel coa-

Epist. 43.
De Ponder.
aphor. V.

3
 cervatum in vesiculis seminalibus ad nobile generationis opus semen sponte suâ profundi vir maret; quin etiam quasi facta crisi per urinam paulò copiosior aut turbidior corporis pondus circa cuiusque mensis finem minuitur. Resluentis transpirationis species est menstrui sanguinis secretio. Fit ille refluxus ex auctâ perspirationis insensibilis materie, quæ per coangustatos partium meatus difficilè fluens, in vasa majora cogitur resfluere. Illucescit illud idem in morbis, in quibus præ copiâ humoris ad exitum impetum facientis, latentes fiunt *menstruæ*, quæ per certum temporis spatium intra partes cum sanguinis circuitu feruntur. Sic in magnis vulneribus imperfecta, licet abundans ferè semper sit puris excretio, ejusdem pars à vasis capillaribus in vulneris superficie hiantibus sæpius resorbetur, & ad sanguinis massam reducitur: hinc mors repentina, nisi felix puris abundantis per urinas fiat emissio; quod quandoque accidit. Circa pubertatis tempus jam est fibrarum, confirmatus elater: majori ergo cum robore quatitur undique sanguis; magis pressus ille, majori cum velocitate vasa percurrit. Ex his sequitur & nutritio minor, & major evacuatio. Partes enim nutritioni aptæ, successivè ad fibrillarum ostiola venientes, tantâ vi à sequentibus propelluntur, ut fibris adhærendi non deur tempus. Itaque qui partibus alendis prius inserviebat humor, nunc in ipsarum impetui sustinendo totus est: sed cum resistere diu nequeat, ab altero subsequenti liquore ad cutem usquè tantâ vi expellitur, ut difficilè cederet, nisi pars quædam per lymphatica vasa excretoriis canaliculis vicina in venas rediret, de integro utilis futura, si per muliebria evacuetur.

IV.

SOLIDAS inter & fluidas corporis partes perfectum æquilibrium dari non magis est possibile quàm temperamentum *æquale ad pondus*. Si daretur, cessaret motus. Indefinenter cum fluidis luctantur solida: nunc hæc, nunc illa primas tenent. Fluidorum tamen in corpore sano fugax est victoria; statim atque resistunt nimium, per viam faciliorem eliminantur. Menstruorum inde effluxus intelligitur. Singulo quoque die ex resuâ insensibilis transpirationis portione additur sanguini corollarum quoddam, quo non solum augeatur liquidus pondus, sed & fibrarum ipsarum elaterium multiplicatur. Elaterio certi sunt limites, quos ultra nequit extendi; at nullus liquorum quantitati & ponderi datur gradus. In fibrarum iusto & innato elatere tota naturæ visposita est. Nihil aliud est natura, quàm partium corporis mechanica dispositio ad motum à primâ imperitum causâ conservandum. Omnis naturæ motus ad functionum integritatem fit, quamvis in morbis à solito movendi modo aberrare quandoque ipsa videatur. Hanc ob causam superfluum sanguinem in statu sano ad uterum propellit. Uterus ex illarum partium numero est, quarum usus non est perennis, sed ad tempus; ut sunt capsulæ atrabilarie, glandula Thymus, vasa umbilicalia, mamma, testiculi. Respectu horizontis perpendiculariter situs est in hypogastrio, seu abdominis parte infimâ quæ pelvis dicitur. Substantia mollis est, fungosus, facilè extensilis, nec multum elasticus, ferè liber, quasi pendulus, vix pressus, totus denique vasis constans, quorum series innumeris notabilis est circumvolutionibus. Locus hic est quieti dicatus, situ suo minorique compressione magis obsecundans. Locus hic est quo natura pleno ruit flumine, dum omnes sanæ sunt partes, id est, ubi in omnibus organis validus adest elater, ita ut cruoris superflui resistentiâ sustinere possint, eundemque potentius diverberare valeant. Præter ea sanguinis descensum juvat aortæ descendens amplior in foeminis diameter. Sic liquorum pondus ex resfluente insensibili transpiratione auctum unoquoque mense, fluente menstruo minuitur.

V.

ERIT igitur menstrui sanguinis & insensibilis transpirationis una eademque materies, succi scilicet alibilis superflua portio. Solis differunt accidentibus: hæc insensibilis est, ille sensibilis obviis: hæc partibus magis divisis magisque comminuitur constat, ille iisdem magis inter se coherentibus. Sese vicissim excipiunt; imminuto enim solito perspirationis fluxu, major exurgit menstruorum provenus. Si ex labore, exercitiis, balneis, aëre calidiori major educitur perspirationis quantitas, parcius deinde fluent menses. Testantur illud idem urbana nostræ mulierculæ quæ umbratilis vitæ delicias amant: hæc cum genio indulgeant, ab omni duro labore temperent, mollique

immergantur otio, quo corpus victum efficitur & plurimo turgidum adipe, solent minus perspirare, plurimo tinguntur menstruo, sæpius ægrotant, citius ad plures transeunt. Rusticæ e contra, quarum corpora duris exercitiis laboribus, firmiores sunt, perspirant ut viri, parum aut nihil excernunt sanguinis menstrui, & ad extremum usque senium absque ullo sanitatis detrimento vitam vivunt. Cutem ergo & uterum inter insignis est consensus. Quibus fœminis præ ætate jamjam purgari desinit uterus, illæ compluribus affici solent morbis, sed potissimum cutem infestantibus, scabie scilicet, impetigine, tuberculis sub cute nascentibus. Hi ferè omnes affectus ex Catameniorum oriuntur materiâ, quæ, cum ipsi reculetur per uterum transitus, ad cutem tanquam ad originem cogitur remeare.

Ergo fluxus menstrui & transpirationis materies eadem.

DOMINI DOCTORES DISPUTATURI.

M. Petrus Afforty.

M. Andreas de Lalen.

M. Germanus Preaux, Professor Regius.

M. Claudius-Antonius Renard.

M. Joannes Franciscus Giot.

M. Joannes Cordelle.

M. Franciscus Bailly.

M. Franciscus-Antonius le Dran.

M. Dominicus de Farcy, antiquus Facultatis Decanus.

Proponerebat Parisiis ANTONIUS CASAMAJOR;
Bencarnensis, Baccalaureus Medicus, A.R.S.H. 1720.
à sextâ ad meridiem,